



Minggu, 17 Oktober 2021
Siman Ogen : Johanes 15: 7-8



Erbuah Meramis



Meriah kal ukurta Moria, sabap kita nderbih enggo mperingeti Hari Ulang Tahun (HUT) Moria. I bas pertambahan usia, erpengarapen Gerejanta maka Moria GBKP jadi Moria si erbuah meramis i tengah-tengah jabu. Buah-buah meramis e eme si teridah i bas kekelengen nandangi mamre bagepe anak-anak, kinihamaten nandangi perbulangen/mamre i bas jabu, kiniteken si tetap guna ngoge Pustaka Si Badia dengen ertoto guna jabu, mereken pengajaren man anak bagi si ngena ate Tuhan, kinijingaten i bas erdahin mpesikap si perlu i bas jabu bagepe mbina komunikasi si mehuli i bas jabu. I bas kegeluhen Tuhanta Jesus Kristus i bas doni enda, pernah iturikenNa man jelma si nterem kerna buah si meramis i bas batang anggur. Sabap kai si ituriken Jesus e langsung banci iidah kalak si megisa, mesunah pe mbayangkenca. Nina Jesus adina kam la ersada ras Aku, labo kam ngasup erbahan kai pe. Adi kam tetap i bas Aku, janah katangKu tetap nggeluh i bas kam, banci ipindondu dengen alokenndu pe kai si ipindondu e. Si ituriken Jesus e eme ibaratna njagai kiniersadan Moria ras Dibata. Arah e me turah kinitekenta dengen tek kita, adi ertoto kita pemindonta ibereken Dibata, iberekenNa si mehuli.

Tole nina Jesus: adi melala buahndu kam me ajar-ajarKu. Kepe buah si meramis nandakenca dahan-dahan batang kayu e ersada ras dahanna, seh maka kerina nutrisi si iperluken batang kayu e tuhu-tuhu seh ku dahan. Emaka dahan e mereken buah si meramis. Tapi adi mesepak dahanna, bicara lit pe buahna lanaibo sikap nanamna. Megersing buahna misalna tapi gersingna labo nandakenca sehat buah e tapi ban iparpar matawari nari ngenca. Lanai sikap man pangan. Buah si iarapken Dibata eme buah si sehat, i bas kegeluhen kiniteken buah si mpermuliaken Tuhan arah kegeluhen anak-anakNa si tek baNa.